

摘藻堂四庫全書薈要

史部

欽定四庫全書薈要卷六千三百九

金史卷六十七

元中書右丞相總裁托克托等修

列傳第五

錫馨

和諾克弟薩克達

烏春

溫都布
拉附

拉必弟瑪察

通恩

埒克

阿蘇

奚王和勒博

錫馨海蘭水烏凌阿部人昭祖以條教約束諸部錫馨
陸梁不可制及昭祖沒於巴喇濟村部人以柩歸至海
蘭水錫馨與完顏部鄂和出而邀諸路攻而奪之柩揚
言曰汝輩以舒嚕為能而推尊之吾今得之矣昭祖之
徒往告於佛穆丹與瑪竒嶺赫伯村完顏部蒙克巴圖
等募軍追及之與戰復得柩衆推景祖為諸部長白山
頁赫圖們孔蘭托卜古倫五國皆從服之遼使赫嚕林
牙來索逋人錫馨拒阻不聽命景祖攻之不能克景祖

自度不可以力取遂以詭計取之乃以錫馨阻絕海東
路請於遼遼帝使人讓之曰汝何敢阻絕鷹路審無他
意遣其酋長來錫馨使其長子頗克綽歡入朝曰不敢
違大國之命遼人厚賜遣還謂之曰汝父信無他宜身
自入朝錫馨信之明年入見於春蒐頗克綽歡從遼主
謂錫馨曰罪在汝不在汝子乃命頗克綽歡還而流錫
馨於邊地蓋景祖以計除錫馨而欲撫有其子與部人
也頗克綽歡蓄怨未發會哈勒渾水赫舍哩部拉必瑪

察叛頗克綽歡從之及敗於穆稜水瑪察遜去頗克綽歡與拉必就擒及其黨與皆獻之遼主久之世祖復使人言曰頗克綽歡不還則其部人自知罪重恐懼不肯歸服遼主以為然遂遣頗克綽歡及前後所獻罪人皆還之

和諾克薩克達兄弟者國相雅達之子也居完顏部伊敦村雅達稱國相不知其所從來景祖嘗以幣與馬求國相於雅達許之景祖得之以命肅宗後薩哈亦居是

官烏和諾克兄弟嘗事景祖世祖初季父伯赫有異志
陰誘和諾克欲為亂昭肅皇后往伊敦村世祖肅宗皆
從行遇和諾克薩克達各被酒紛爭遂舉刃相向后親
解之乃止自是謀益甚是時烏春烏木罕亦與伯赫相
結詭以鄂博台賣甲為兵端世祖不得已而與之和間
數年烏春以其衆涉和倫拉林二水世祖親往拒之和
諾克薩克達遂起兵肅宗以偏師拒和諾克薩克達世
祖畏其合勢也戒之曰可和則和否則戰至烏魯斯哈

珠水既陣成列肅宗使富德貝勒議和和諾克亦恃烏
春之在北也無和意富德報肅宗曰敵欲戰或曰戰地
迫近村墟雖勝不能盡敵宜退軍誘之寬地肅宗惑之
令軍少却未成列和諾克薩克達乘之肅宗敗焉和諾
克乘勝鈔畧是役也烏春以久雨不能前乃罷兵世祖
聞肅宗敗自將經舍琿特克兩水取和諾克薩克達之
家和諾克薩克達不知也焚其所居殺畧百許人而還
未至軍肅宗之軍又敗世祖至責讓肅宗失利之狀使

罕都伊克以本部七穆昆助之復請和和諾克薩克達

欲得英格之大赤馬希卜蘇之紫騮馬世祖不許遂與

博都哩部布呼富察部薩克蘇及混同江左右布克坦

水北諸部兵皆會厚集為陣鳴鼓作氣馳騁和諾克恃

其衆有必勝之心下令曰今天門開矣以爾車自隨凡

烏古孛夫婦寶貨財產悉爾取之有不從者俘畧之而

去於是摩多圖水費摩部鄂博貝勒附於世祖和諾克

等縱火焚之鄂博死世祖厚撫其家既定和諾克乃以

舊地還之和諾克軍復來富察部沙津貝勒呼卜圖貝勒使愛實間道來告且問曰寇將至何以待之世祖曰事至此不及謀矣以衆從之自救可也惟以旗幟自別耳每有兵至則輒遣愛實穿林潛來令與拜察往還大遒即故潛行林中路也和諾克至北隘甸世祖將出兵聞伯赫食於圖們村死矣乃沿接春水行且欲并取海古勒珠爾蘇貝勒之衆而後戰覘者來報曰敵至矣世祖戒希卜蘇整軍速進使待於托果原當是時和諾克

兵衆世祖兵少衆寡不敵比世祖至軍士氣衄甚世祖
心知之而不敢言但令解甲少憩以水洗面飲麩水頃
之士氣稍蘇息是時肅宗求救於遼不在軍中將戰世
祖屏人獨與穆宗私語兵敗則就與肅宗乞師以報讐
仍令穆宗勿預戰事介馬以觀勝負先圖去就乃袒袖
鞬弓服矢以縕袍下幅護前後心三揚旗三撾鼓棄旗
提劒當前鋒盡銳搏戰和諾克步軍以千盾進世祖之
衆以長槍擊之步軍大敗希卜蘇從後奮擊之和諾克

騎兵亦敗世祖乘勝逐北摩多圖水水為之赤世祖止
軍勿追盡獲所棄車甲馬牛軍實以戰勝告於天地頒
所獲於將士各以功為差未幾和諾克薩克達率屬來
降布呼猶保薩喇村招之不出薩克蘇據烏魯斯哈珠
村世祖遣人與之議和薩克蘇謾言為戲荅之曰我本
欲和壯士巴特瑪不肯和泣而謂我曰若果與和則美
衣肥羊不可復得是以不敢從命遂縱兵俘略隣近村
墅有人從道傍射之中口死布呼之屬曰舒魯舒魯之

母嫁於圖們部達爾歡貝勒而為之妾達爾歡與族兄
弟茂賽音貝勒俱事世祖世祖欲間舒魯於布呼謂達
爾歡曰汝之事我不如茂賽音之堅固也蓋謂舒魯母
子一彼為一此為一以此撼舒魯舒魯聞之遂殺布呼而
降舒魯通於布呼之妾常懼得罪及聞世祖言惑之使
告於達爾歡曰將殺布呼而來汝待我於江向布呼睡
熟刺刃於胸而殺之追者急白日露鼻匿水中逮夜至
江方游以濟達爾歡使人待之乃得免久之醉酒而與

達爾歡狠爭達爾歡殺之

烏春阿卜薩水溫都部人以鍛鐵為業因歲歉策杖負
擔與其族屬來歸景祖與之處以本業自給既而知其
果敢善斷命為本部長仍遣族人富德送歸舊部富德
烏春之甥也世祖初嗣節度使叔父伯赫陰懷覬覦間
誘和諾克薩克達及烏春烏木罕等烏春以伯赫居肘
腋為變信之由是頗貳於世祖而虐用其部人部人訴
於世祖世祖使人讓之曰吾父信任汝以汝為部長今

人告汝有實狀殺無罪人聽訟不平自今不得復爾為也烏春曰吾與汝父等輩舊人汝為長能幾日干汝何事世祖內畏伯赫恐羣朋為變故曲意懷撫而欲以婚姻結其歡心使與約婚烏春不欲笑曰狗彘之子同處豈能生育呼爾哈與女直豈可為親也烏春欲發兵而世祖待之善無以為端仄爾佳部鄂博台亦鐵工也以被甲九十來售烏春聞之使人來讓曰甲吾甲也拉林水以南布克坦水以北皆吾土也何故輒取吾甲其亟

以歸我世祖曰彼以甲來市吾與直而售之烏春曰汝不肯與我甲而為和解則使汝叔之子色克及色埒來色克蓋赫伯之子也世祖度其意非真肯議和者將以有為也不欲遣衆固請曰不遣則必用兵不得已遣之為色埒曰色克無害彼且執汝矣半途辭疾勿往既行色埒曰我疾作將止不往色克曰吾亦不能獨往矣同行者強之使行既見烏春烏春與色克厚為禮而果執色埒曰得甲則生否則殺汝世祖與其甲色埒乃得歸

烏春自此益無所憚後數年烏春舉兵來戰道色辰嶺
涉和倫拉林水舍於珠格部阿勒哈村卓巴納貝勒家
時十月大雨累晝夜不止冰漸覆地烏春不能進乃引
去於是和諾克薩克達亦舉兵世祖自拒烏春而使肅
宗拒和諾克烏春遇雨歸適叔父伯赫亦死故世祖得
併力於和諾克薩克達一戰敗之沃呼部入博諾舊事
景祖至是亦有他志徙於納巴克坦村遂以縱火誣罕
都欲因此除去之語在罕都博中世祖獲博諾釋其罪

博諾終不自安徙居圖庫村與烏春烏木罕結約烏春
舉兵度嶺世祖駐軍溫關村待之進至蘇蘇海甸兩皆
陣將戰世祖不親戰命肅宗以左軍戰色埒默希卜蘇
助之徵異夢也肅宗束縕縱火大風從後起火熾烈時
八月野草尚青火盡燎烟焰漲天烏春兵在下風肅宗
自上風擊之烏春大敗復獲博諾獻於遼而城蘇蘇海
甸以據之赫舍哩拉必瑪察與世祖戰於野鵲水世祖
中四創軍敗拉必使吉遜圖罕等過青嶺見烏春賂諸

部與之交結拉必瑪察求助於烏春烏春以古哩甸兵
百十七人助之世祖擒拉必獻於遼主并言烏春助兵
之狀仍以不修鷹道罪之遼主使人至烏春問狀烏春
懼乃為譎言以告曰未嘗與拉必為助也德里石之北
古哩甸之民所管不及此拉必既敗世祖盡得烏春古
哩甸助兵一百十七人使其卒長烏新烏爾圖往招其
衆繼遣薩布貝勒撫定之薩布不能撫富察部古實巴
克賓等誘三百餘人入城盡陷之世祖治鷹道還色埒

默來告乃使罕都為都統破烏春烏木罕於實都古實
巴克實皆就擒世祖自將過沃濟嶺至烏木罕村和倫
瓜爾佳部雙寬貝勒烏雅部富哲固納請分一軍由所
部伐烏春蓋所部與烏春近欲以自蔽故也乃使色埒
默雅爾盤以支軍道其所居世祖自將大軍與罕都合
至阿卜薩水嶺東諸部皆會實圖美亦以所部兵來是
時烏春前死烏木罕聞知世祖來伐訴於遼人乞與和
解使者已至其家世祖軍至烏木罕請緩師盡以前所

納亡人歸之世祖使烏凌阿果多歡貝勒往受所遣亡者烏木罕以三百騎乘懈來攻世祖敗之遼使惡其無信不復為主和乃進軍圍之太祖衣短甲行圍號令諸軍烏木罕使托雲潛出城攻之托雲馳馬援槍已將及太祖和爾和擊斷其槍乃得免色埒默至色辰水用固納計取先在烏春軍者二十二入烏春軍覺之殺二人餘二十人皆得之益以土軍來助烏木罕自知不敵乃遁去遂克其城盡以資產分賚軍中以功為次諸部皆

安輯烏穆宗常嘉固納功後以色埒默之女守寧妻其子呼爾罕烏春之後為溫都氏裔孫曰布拉

溫都布拉始居長白山阿布徹河徙隆州額勒敏河布拉初從希尹征伐攝明安穆昆事遇賊突出力擊敗之手殺二十餘人用是擢修武校衛天德初充護衛遷宿直將軍與衆護衛射遠皆莫能及海陵以玉鞍銜賞之往海蘭路選可充護衛者使還稱旨遷伊囉幹羣牧使改遼州刺史正隆伐宋召為武翼軍副都總管將兵二

千至汝州南遇宋兵二萬餘邀擊敗之手殺將士十餘人是時嵩汝兩州百姓多逃去布拉招集使之復其業改莫州刺史徵為太子左衛率府率再遷隴州防禦使歷鎮西呼爾哈顯德軍節度使致仕卒

拉必瑪察兄弟者哈勒琿水赫林鄉赫舍哩部人兄弟七人素有名聲人推服之及烏春烏木罕等為難故拉必兄弟乘此際結屯水之民勢寢不可制其同里中有避之者徙於必罕村野居女直中拉必怒將攻之乃約

烏庫哩部薩喇貝勒富哲達蘭呼實默貝勒和羅貝勒
溫綽歡貝勒和羅溫綽歡間使人告野居女直野居女
直有備拉必等敗歸拉必乃由南路復襲野居女直勝
之俘略甚衆和羅溫綽歡呼實默畏拉必求援於世祖
色埒默以輕兵邀拉必等於特默圖村敗之盡得所俘
拉必瑪察驅掠拉林水牧馬世祖至混同江與穆宗分
軍世祖自圖古勒津倍道兼行馬多乏皆留之路傍從
五六十騎遇拉必於野鵲水日已曛拉必兵衆世祖兵

少罕都鏖戰出入數四馬中槍死者十數世祖突陣力
戰中四創不能軍穆宗自額圖琿津渡江遇敵於巴喇
密特水敵問為誰應曰罕都問者射穆宗矢著於弓箛
是歲拉必瑪察使其徒吉遜圖罕及托廸剽取呼拉布
灤牧馬四百及富哲尼堪之馬合七百餘匹過青嶺東
與烏春烏木罕交結世祖自將伐之拉必等偽降還軍
拉必復求助於烏春烏木罕烏木罕以古哩甸兵百有
十七人助之拉必據穆稜水保固險阻錫馨子頗克綽

歡往從之世祖率兵圍之克其軍瑪察遯去遂擒拉必
及頗克綽歡獻之遼盡獲其兵使其卒長烏新烏爾圖
招撫其衆俾薩布撫定之復使鄂蘭哈瑪爾察穆稜水人請
并募兵與薩布合語在烏春傳世祖既沒肅宗襲節度
使瑪察據哲克依水繕完營堡招納亡命杜絕往來者
恃屯水民為之助招之不聽乃使康宗伐之是歲白山
混同江大溢水與岸齊康宗自阿林岡乘舟至於刷水
舍舟沿刷水而進使太祖從東路取瑪察家屬盡獲之

康宗圍瑪察急太祖來會軍於是瑪察先亡在外其人
乘夜奪圍遁去太祖曰瑪察之家蕩盡矣走將安歸追
之瑪察不知太祖急求已也與三騎來伺軍其一人墜
馬下太祖識之問狀其人曰我隨瑪察來伺軍彼走者
二人瑪察在焉瑪察與其人分道走太祖命呼魯古追
東走者而自追西走者至哲克依水失瑪察不見急追
之得遺甲於路迹而往前至大澤潭渚瑪察棄馬入崔
葦太祖亦棄馬追及之與之挑戰庫哩壯士士和爾和

乘馬來問曰此何人也太祖初不識瑪察佯應曰瑪察也和爾和曰今亦追及此人邪遂下馬援槍進戰瑪察連射和爾和和爾和中二矢不能戰有頃軍至圍之罕都射中瑪察首遂擒之無有識之者和爾和乃前扶其首而視之見其齒豁曰真瑪察也瑪察張目曰公等事定矣遂殺之太祖獻馘於遼

通恩阿爾本特克新水赫舍哩部人祖曰和羅奇父訥格訥世為其部貝勒威準部人伊喇貝勒海罕貝勒暴

其族人完塔哈貝勒及諸弟烏呼赫烏都溫抄畧其家
及抄畧阿古爾貝勒家侵及訥格納所部穆宗使訥格
納以本部兵往治伊喇等行至蘇伯水輒募人為兵主
者拒之輒抄畧其人遂攻烏庫哩部達薩塔入穆魯密
斯罕城及烏色伊克來問狀止蘇伯水西諾木歡村訥
格納止蘇伯水東烏滿村訥格納雖款伏而不肯徵償
時甲戌歲十月也明年八月訥格納遯去烏色追而殺
之執其母及其妻子以歸而使通恩復其所

埒克圖們琿春水合流之地烏庫哩部人呼沙呼貝勒之子卓多琿春水安春之呼沙呼之子也間誘烏遜烏塔兩部民作亂達薩塔通恩皆叛而與埒克卓多合兩黨揚言曰圖克坦部之黨十四部為一烏庫哩部之黨十四部為一富察部之黨七部為一凡三十五部完顏部十二而已以三十五部戰十二部三人戰一人也勝之必矣世祖降附諸部亦有離心當是時惟有烏雅部色埒貝勒及圖們水溫特赫部阿勒巴貝勒薩克蘇貝

勒等皆使人來告難色埒達希布之子也先使其兄巴古喇來旣而以其甲來歸阿勒巴等曰吾等必不從亂但乞兵為援耳穆宗使薩哈伐埒克使們圖琿伐達薩塔旣而太祖以七十甲詣薩哈軍中道以四十甲與們圖琿實圖美之軍與們圖琿會於穆魯密斯罕城下而通恩將援埒克聞們圖琿之兵寡以為無備而未知實圖美之來會也欲先攻們圖琿們圖琿實圖美迎擊大破通恩穆魯密斯罕城遂降獲通恩達薩塔皆釋弗誅

太祖至薩哈軍明日遂攻破埒克城城中渠帥皆誅之
取其孥累貲產而還烏塔城亦撤守備而降埒克先在
遼烏塔已脫身在外由是皆未獲卓多亦詣普嘉努降
太祖釋之於是諸部皆安業如故久之埒克烏塔皆來
降

阿蘇錫馨水赫舍哩部人父阿哈貝勒事景祖世祖世
祖破烏春還阿哈率官屬士民迎謁於桑阿塔濼獻黃
金五斗世祖諭之曰烏春本微賤吾父撫育之使為部

長而忘大恩乃結怨於我遂成大亂自取滅亡吾與汝等三十部之人自今可以保安休息吾大數亦將終我死汝等當念我竭力以輔我子弟若亂心一生則滅亡如烏春矣阿哈與衆跪而泣曰太師若有不諱衆人賴誰以生勿為此言未幾世祖沒阿哈亦死阿蘇繼之阿蘇自其父時常以事來昭肅皇后甚憐愛之每至必留月餘乃遣歸阿蘇既為貝勒嘗與圖克坦部卓多貝勒爭長肅宗治之乃長阿蘇穆宗嗣節度聞阿蘇有異志

召阿蘇賜以鞍馬深加撫諭陰察其意趣阿蘇歸謀益甚乃斥其事復召之阿蘇不來遂與同部穆都哩貝勒等起兵穆宗自瑪竒嶺出兵攻之薩哈自和倫嶺往畧定珊沁錫馨兩路攻下通恩城穆宗畧阿齊呼水益募軍至阿蘇城是日辰巳間忽暴雨晦暝雷電下阿蘇所居旣又有大光聲如雷墜阿蘇城中識者以謂破亡之徵阿蘇聞穆宗來與其弟達呼布往訴於遼遼人來止勿攻穆宗不得已留和卓貝勒守阿蘇城而歸金初亦

有兩和卓其一薩哈父贈韓國公其一守阿蘇城者後
贈特進云和卓以兵守阿蘇城者二年矣阿蘇在遼不
敢歸穆都哩乃降遼使復為阿蘇來穆宗聞之使烏凌
阿舒魯濟師且戒和卓令易衣服旗幟與阿蘇城中同
色使遼使不可辨遼使至乃使富察部呼魯貝勒密遜
貝勒與俱至和卓軍中已易衣服旗幟與阿蘇城
中如一遼使果不能辨和卓詭曰吾等自相攻干汝何
事誰識汝之太師乃刺殺呼魯密遜所乘馬遼使驚怖

走去遂破其城達呼布先歸殺之阿蘇聞穆宗以計却
遼使破其城殺達呼布復訴於遼遼使奚節度使伊里
來問狀且使備償阿蘇穆宗復使矩威圖塔水人偽阻
絕鷹路者而使布古德部節度使言於遼平鷹路非已
不可遼人不察也信之穆宗出畋於屯水謂遼人曰吾
平鷹路也遼人以為功使使來賞之穆宗盡以其物與
矩威圖塔之人而不復備償阿蘇遼人亦不復問阿蘇
在遼無所歸後二年使其徒德濟至生女直界上海蘭

甸人畏穆宗執而送之阿蘇遂終於遼及太祖伐遼底
遼之績告於天地而以阿蘇亡命遼人不與為言凡與
遼往復書命必及之天輔六年棟摩羅索畧定天德雲
內寧邊東勝等州獲阿蘇軍士問之曰爾為誰曰我破
遼鬼也

贊曰金之興也有自來矣世祖擒拉必頗克綽歡既獻
之遼以為功又曰若不遣還其部人疑懼且為亂階遼
人不察盡以前後所獻罪人歸之景祖止赫魯林牙止

通肯穆宗止遼使阿蘇城始終以鷹路誤之而遼人不
悟景祖有黃馬服乘如意景祖沒遼貴人爭欲得之世
祖弗與曰難未息也馬不可以與人遂割其兩耳謂之
秃耳馬遼貴人乃弗取其削平諸部則借遼以為己重
既獻而求之則市以為己重戰陣一良馬終弗與遼人
而遼人終不悟豈興亡有數蓋天奪其魄歟

奚與契丹俱起在元魏時號庫莫奚厯宇文周隋唐皆
號兵強其後契丹破走奚奚西保隆科其留者臣服於

契丹號東西奚厥後遼太祖稱帝諸部皆內屬矣圖
者古部族之號奚有其地號稱圖圻州又書作鐵驪州
奚有五世族世與遼人為昏姻附姓舒魯氏中事具遼
史今不載奚有十三部二十八落一百一帳三百六十
二族甲午歲太祖破耶律色實諸將連戰皆捷奚鐵驪
王和勒博以所部降未幾遼歸於遼及遼主使使請和
太祖曰歸我叛人阿蘇降人和勒博廸里等餘事徐議
之久之遼主至駕鶩灤都統果襲之亡走天德和勒博

與遼大臣立秦晉國王耶律聶只于燕京聶只死蕭妃
權國事太祖入居庸關蕭妃自古北口出奔和勒博至
盧龍嶺遂留不行會諸奚吏民于雅里部僭稱帝改元
天復改置官屬籍渤海奚漢丁壯為軍太祖詔和勒博
曰問汝脅誘吏民僭竊位號遼主越在草莽大福不再
汝之先世臣服于遼今來臣屬與昔何異汝與伊都有
隙故難其來伊都設有睚眦朕豈從之儻能速降盡釋
汝罪仍俾主六部族總山前奚衆還其官屬財產若尚

執迷遣兵攻討必不汝赦何勒博不聽天輔七年五月
和勒博南寇燕地敗於景薊間其衆奔潰耶律阿固齊
及甥巴錦家奴伯特赫等殺之其妻阿古聞之自剄死
先是蘇庫部人據克斯山奚路都統達蘭招之不服往
討之托紐部衆抗險拒戰殺之殆盡至是蘇庫卓琳托
紐三部所據十三岩皆討平之達嚕噶部節度使伊里
已降復叛奚馬和尚討達嚕噶并五院司等諸部諸部
皆降遂執伊里杖之一百其父及其家人先被獲者皆

還之初太祖破遼兵于達魯噶城九百奚營來降至是
和勒博死奚人以次附屬亦各置明安穆昆領之

贊曰庫莫奚契丹起於漢末盛於隋唐之間俱彊為隣
并為君臣歷八百餘年相為終始奚有五大定間
契丹族著姓有約羅氏伯特氏幹里氏穆濟氏吹氏

金史卷六十七



總校官舉人臣章維桓

校對官中書臣吳樹萱

謄錄監生臣龔履正

欽定四庫全書薈要

史部

金史卷

六十八至
七十二

詳校官編修臣程嘉謨



欽定四庫全書薈要卷六千三百十

金史卷六十八

元中書右丞相總裁托克托等修

傳第六

罕都

子默音

伊克

阿里布

固納

額爾古訥

芬徹

罕都完顏部人祖舒嚕與昭祖同時同部同名交相得



誓曰生則同川居死則同谷葬土人呼昭祖為勇舒嚕
呼舒嚕為賢舒嚕初烏蘇展部有美女名博多和青嶺
東混同江舒舒水人掠而去生二女長曰達呼幼曰濟
色昭祖與舒嚕謀取之遂偕至嶺右炷火於箭端而射
舒舒水人怪之皆走險阻久之無所復見却還所居昭
祖及舒嚕以衆至攻取其背產虜二女子以歸昭祖納
其一賢舒嚕納其一皆以為妾是時諸部不肖用條教
昭祖耀武于青嶺白山入于蘇伯扎蘭之地賢舒嚕佐

之也其後別去至景祖時舒嚕之子嚕順舉部來歸居於接春水源庫堪山之南庫堪山者所謂和琳之地是也罕都嚕順子世祖初襲節度使而伯赫以屬尊蓄異謀不可制諸部不肯受約束相繼為變罕都入與謀議出臨戰陣未嘗去左右沃哱部人傳諾自景祖時與其兄弟俱居接春水之北及烏春作難傳諾將與烏春合間誘烏嚕斯哈珠水居人與之相結欲先除去罕都會其家被火陰約隸人布格蘇詭稱放火為罕都呼圖二

人使珠敦來謂世祖曰布格蘇來告曰前日之火罕都等縱之若不棄舊好其執縱火之人以來世祖疑之蘇爾噶勒貝勒曰博諾兄弟也豈以一二人之故而與兄弟構怨乎彼自取之又將尤誰不如與之便罕都被甲執戟而起曰彼為亂之人也若取太師兄弟則亦與之乎今取我輩我輩決不可往若必用戰當盡力致死穆宗曰壯哉罕都以我所見正如此耳贈罕都以馬曰戰則乘此衆皆稱善世祖乃往見博諾隔必喇水而與之

言曰布格蘇既告縱火由罕都等謹當如約當先遣布格蘇來布格蘇至世祖於馬前殺之使博諾見之既而聞之放火者博諾家人思楚華善也博諾欲開此釁故以誣罕都云拉必瑪察與世祖遇于野鵲水日已曛惟從五六十騎罕都入敵陣鏖擊之左右出入者數四世祖中創乃止烏春烏木罕據哈勒琿水世祖既許之降遂還軍於是薩喇貝勒富哲達蘭觀勝負不助軍而薩喇達蘭先曾與拉必瑪察合世祖欲因軍還而遂滅之

馳馬前進達蘭者貞惠皇后之弟也罕都下馬執轡而
諫曰獨不念愛弟費揚古與弟婦乎世祖感其言遂止
費揚古者漢語云幼弟也世祖母弟中穆宗最少故云
然穆宗德罕都言後以達蘭女克爾森妻其子古新太
祖追瑪察罕都射中其首獲之遼人命穆宗太祖希卜
蘇罕都俱為詳袞烏新烏爾圖以古哩甸兵來歸使薩
布貝勒撫定之富察部古寶巴克實等誘其衆入城陷
三百餘人罕都為都統往治薩布失軍之狀盡解薩布

所將軍大破烏春烏木罕於寶都擒古實巴克實初頁
赫水納哈塔部薩巴之弟曰安扎與人爭部族官不得
直遂來歸安扎之甥曰薩必曰薩塔希卜蘇破烏春烏
木罕城獲薩必薩塔并獲其母以為次室撫其二子薩
塔告安扎必為變不信而殺之薩塔臨刑歎曰日後必
當知之至是安扎果為變因穆宗晨出獵糾率七八人
操兵入宅奪據寢門劫貞惠皇后及家人等罕都入見
安扎曰汝輩所謀之事奈何閨門眷屬豈足以劫質徒

使之驚恐耳汝固識我盍以我為質也再三言之安扎從之貞惠皇后於是得解而質罕都而薩哈希卜蘇使人告急於獵所穆宗亦心動罷獵歸中徒逢告者日午至安扎謂穆宗曰可使係案女直知名官僚相結送我兄弟親屬由咸州路入遼國庫金厩馬與我勿惜罕都亦當送我至遼境然後還而要穆宗與之盟穆宗皆從之遂執罕都及阿勒坦阿喇卜丹等七人共以衣裾相結與安扎俱行至遼境乃釋罕都罕都至濟州實黃龍

府使人馳驛要遮安扎之黨屬惟縱其親人使去遂殺
薩必并其母遣使報於遼乞還安扎遼人流之和勤端
城其後安扎懷思鄉土亡歸附于係案女直因亂其官
僚之室捕之不伏乃見殺穆宗襲位之初諸父之子錫
林錫伯及諸兄有異言曰君相之位皆渠輩為之奈何
罕都曰汝輩若紛爭則吾必不默默但已衆聞之遂帖
然自是不復有異言者罕都事四君出入四十年征伐
之際遇敵則先戰廣廷大議多用其謀世祖嘗曰吾有

罕都則何事不成肅宗時委任冠於近僚穆宗嗣位凡
圖遼事皆專委之康宗以為父叔舊人尤加敬禮多所
補益康宗十一年癸巳二月得疾避疾於默勒們水薨
年六十三喪歸康宗親迓於路送至其家親視葬事天
會十五年追贈儀同三司代國公明昌五年贈開府儀
同三司諡曰忠敏子古新默音古新別有傳默音當安
扎之難曾從罕都代為質後與宗峻俱侍太祖宗峻坐
默音上上怒命坐其下自勒拉巴哩博克順希卜蘇三

人爭千戶上曰汝輩能如罕都父子有勞於國者乎乃命默音為千戶三人者皆隸焉其眷顧如此天輔五年十二月卒天會十五年贈太子少傅

伊克系出景祖居舍音水完顏部為其部貝勒與同部人巴哩貝勒鄂敏水富察部歡托和貝勒蘇都貝勒特克新特布水完顏部安圖貝勒圖卜穆爾水溫特赫部和囉海貝勒俱來歸金自此益大肅宗拒和諾克已再失利世祖命罕都伊克以本部穆昆之兵助之伊克與

罕都常在世祖左右居則與謀議出則泣行陣未嘗不
在其間天會十五年贈銀青光祿大夫明昌五年贈特
進諡忠濟與代國公罕都特進和卓開府儀同三司博
諾儀同三司巴達俱配享世祖廟廷伊克子阿里布固
納額爾古訥薩克達薩克達子芬徹

阿里布伊克之子為人魁偉多智略勇於戰未冠從軍
下咸州東京遼人來取海州從貝勒瑪奇往援道遇重
敵力戰斬首千級從烏楞古攻豪懿州以十餘騎破敵

七百進襲遼主阿里布徇北地招降營帳二十四民戶
數千時已下西京棟摩攻應州未下退營於州北十餘
里夜遣阿里布率兵四百伺敵城中果出兵三千來襲
阿里布道與之遇斬首百餘獲馬六十後遼兵三萬出
馬邑之境以千兵擊之斬其將於陣天會初宋王宗望
討張覺於平州聞應州有兵萬餘來援遣阿里布與阿
勒達迎擊之斬馘數千而還復從其兄約罕率兵三千
攻乾州約罕道病卒代領其衆至乾州降其軍及營帳

三千獲印四十與布呼攻下義州宗望伐宋與郭藥師戰于白河宗望命阿里布以二穆昆先登奮戰賞賚特異至汴破淮南援兵斬其二將大軍退次孟陽姚平仲夜以重兵來襲阿里布適當其中力戰敗之既還聞大名開德合兵十餘萬來爭河至河上知去敵尚遠乃以輕兵夜發詰旦至衛縣遇敵斬首數千級餘皆潰去師次邢州滹沱橋已焚阿里布先以偏師營於水上比軍至而橋成宗望嘉其功出真定庫物賞之為長勝軍千

戶及再伐宋從宗望破敵於井陘遂下欒城師自大名
濟河阿里布屯於洺州之境時康王留相州大名府以
兵來攻我營阿里布乘夜以騎二百潛出其後反擊敗
之居數日敵復來蘇統制以兵二萬先至阿里布乘其
未集以三百騎出戰大敗其衆生擒蘇統制殺之大軍
既克汴京攻洺州敗大名救兵遂下洺州從達蘭攻恩
州還洺人復叛阿里布先至城下城中兵出來戰敗之
執其守佐遂與富埒瑋取信德軍梁王宗弼取開德阿

里布以步兵五千赴之大名境內多盜命阿里布留屯其地賊犯莘縣聞阿里布至即潰去追襲一晝夜至館陶及之皆俘以歸從宗弼襲康王既渡淮阿里布以兵四千留和州總督江淮間戍將以討未附郡縣遂攻下太平州隳其城廬州叛以偏師討之敗其騎六千擒三校明日復破敵二萬於慎縣斬首五百張永合步騎數萬來戰阿里布兵止二千敵圍之阿里布潰圍力戰竟敗之追殺四十里獲馬三百而還再攻廬州與達呼布

敗敵萬衆於拓臯至廬州騎兵五百出戰敗之斬其二
校師還宗弼趨陝西道聞大名復叛遣阿里布經略之
獨與譚者至城下招之大名果降翌日下令民間兵器
悉上送官於是吏民按堵如故為大名開德路都統齊
國建阿里布屯兵於汴城外天會十五年詔廢齊國已
執劉麟阿里布先入汴京備變明年除歸德尹割河南
地與宋入為燕京內省使宗弼復河南阿里布先濟河
撫定諸郡再為歸德尹河南路都統宋兵來取河南地

宗弼召阿里布與許州韓常潁州大臬陳州持嘉暉皆會於汴阿里布以敵在近獨不赴而宋將岳飛劉光世等果乘間襲取許潁陳三州旁郡皆響應其兵攻歸德者阿里布連擊敗之復取亳宿等州河南平阿里布功最皇統五年為行臺叅知政事授世襲明安兼哈濟穆昆改元帥右監軍博索路統軍歸德軍節度使累階儀同三司其在汴時嘗取官舍材木構私第於恩州至是事覺法當議勲議親海陵嘗在軍中惡阿里布詔曰若

論勲勞更有過於此者況官至一品足以酬之國家立法貴賤一也豈以親貴而有異也遂論死年五十五阿里布以將家子從征伐屢立功歷官有惠愛得民心及死人皆惜之大定三年贈儀同三司詔以其子為右衛將軍襲明安及親管穆昆賜銀五百兩重綵二十端絹三百匹

固納伊克子善騎射有才幹從討和諾克薩克達烏春烏木罕埒克之叛皆有功太祖伐遼固納從戰寧江州

珠赫店破遼主親軍皆以力戰受賞襲其父穆昆領秦
王宗翰千戶攻下中西兩京宗翰伐宋圍太原未下宗
翰還西京固納以右翼軍佐尼楚赫守太原是時汾州
團柏榆次嵐憲潞皆有兵來援固納凡四戰皆破之大
軍圍汴固納引萬戶軍屢敗其援兵憲潞等州復叛固
納引兵復取之并收撫保德火山而還後領軍鎮夏邊
在職十二年天會八年授世襲明安天眷初為天德軍
節度使致仕累遷開府儀同三司卒年八十五子喜格

襲明安加宣武將軍

額爾古訥伊克子姿質魁偉年十四隸宗翰軍中常領
兵行前為偵候及大軍襲遼主額爾古訥以甲騎六十
追遼招討圖善獲之又以七騎追獲遼公主額布勒以
獻有軍來為遼援方臨陣中有躍馬而出者軍帥謂之
曰能為我取此乎額爾古訥曰諾果生擒而還問其名
曰通古益北部中勇者也額爾古訥善馳驛日能千里
及伐宋屢遣將命以行天會八年從秦王在燕聞伊都

反於西北秦王促令額爾古訥馳驛以往黎明走天德
及至日猶未曛也皇統元年以功授寧遠大將軍哈喇
唐古部節度使五年授千戶六年遷西北路招討使九
年再遷天德尹西南路招討使天德二年召見四年遷
臨洮尹加金紫光祿大夫卒官年五十三

芬徹自上京密齊顯河徙屯天德初為元帥府章京奉
使皆稱職按事能得其實領明安皇統間除同知開遠
軍節度使斥候嚴整邊境無事正隆初為中都路兵馬

判官是時京畿多盜芬徹捕得大盜四十餘人百姓稍
安改安化軍節度副使大定二年領行軍萬戶充邳州
刺史知軍事領本州萬戶管所屯九明安軍昌武軍節
度使山東副都統薩哈南征元帥府以芬徹行副統事
入為太守少詹事再遷開遠軍節度使襲伯父固納明
安歷博索路兵馬都總管西北路招討使卒芬徹性廉
潔忠直臨事能斷凡被任使無不稱云

贊曰賢舒嚕與昭祖為友罕都事景祖世祖為之臣蓋

金自景祖始大諸部君臣之分始定故傳異姓之臣以
罕都為首伊克雖宗室與罕都同功故列叙焉

金史卷六十八

欽定四庫全書薈要卷六千三百十一

金史卷六十九

元中書右丞相總裁托克托等修

列傳第七

太祖諸子

宗雋

本名額爾袞

宗傑

本名穆里延

宗強

本名阿魯

爽

本名阿林

克實

阿蘇

宗敏

本名阿里布

元

本名常勝子育

太祖聖穆皇后生景宣帝豐王烏里趙王宗傑光懿皇
后生遼王宗幹欽憲皇后生宋王宗望克王宗雋潘王
額魯宣獻皇后生睿宗幽王鄂爾多元妃烏庫哩氏生
梁王宗弼衛王宗強曹王宗敏崇妃蕭氏生紀王實訥
埒息王寧吉莒王燕孫娘子特訥克生鄴王幹琿宗幹
宗望宗弼自有傳

宗雋本名額爾袞天會十四年為東京留守天眷元年

入朝與左副元帥達蘭建議以河南陝西地與宋俄為
尚書左丞相加開府儀同三司兼侍中封陳王二年拜
太傅領三省事進封兗國王既而以謀反誅

宗傑本名穆里延天會五年薨天會十三年謚孝悼天
眷元年追封越王以其長子奭為會寧收封鄧王後為
上京留守再改燕京西京皇統三年薨子阿蘭達蘭海
陵為相將謀弑立構而殺之海陵篡立并殺宗傑妻大
定間贈宗傑太師進封趙王

宗强本名阿嚕天眷元年封紀王三年代宗固為燕京留守封衛王太師皇統二年十月薨輟朝七日喪至上京上親臨哭之慟仍親視喪事子阿林克實阿蘓

爽本名阿林天德三年授世襲明安正隆二年除橫海軍節度使改安武軍留守司奉朝請海陵將伐宋嚴酒禁爽坐與弟阿蘇及從父兄亨圖克坦貞會飲被杖下遷歸化州刺史奪明安未幾復除安武軍節度使海陵渡淮分遣使者剪滅宗室爽憂懼不知所出會世宗即

位東京宗室瑋推爽弟阿蘓行中都留守遣人報爽爽
棄妻子來奔與弟忻州刺史克實俱至中都東迎車駕
至梁魚務入見世宗大悅即除殿前馬步軍都指揮使
封溫王改秘書監母憂尋起復遷太子太保進封壽王
頃之世宗第五女蜀國公主下嫁唐古島賜宴神龍殿
謂爽曰朕與卿兄弟在正隆時朝夕常懼不保豈意今
日賴爾兄弟之福可以享安樂矣爽泣下頓首謝未幾
判大宗正事太子太保如故爽有疾詔除其子符寶祇

候色埒為忠順軍節度副使爽入謝上曰朕以卿疾使卿子遷官冀卿因喜而愈也色埒年少未閑政事卿訓以義方使有善可稱別加陞擢爽疾少間將從上如涼陁賜錢千萬進封英王轉太子太傅復世襲明安進封榮王改太子太師顯宗長女鄴國公主下嫁烏庫哩誼賜宴慶和殿爽坐西向迎夕照面發赤似醉上問曰卿醉邪對曰未也臣面迎日色非酒紅也上悅顧羣臣曰此弟出言未嘗不實自小如此因謂顯宗兄弟曰汝等

可以為法以爽貲用有闕特賜錢一萬貫二十三年爽疾久不愈勅有司曰榮王告滿百日當給以王俸既薨上悼痛輟朝遣官致祭賻銀千兩重綵四十端絹四百匹陪葬山陵親王百官送葬他日謂大臣曰榮王之葬朕以不果親送為恨其見友愛如此

克實以宗室子累官唐古部族節度使降忻州刺史海陵遣使將殺之克實聞世宗即位棄州來歸與其兄歸化州刺史阿林會於中都是時弟阿蘓權中都留守事

克實謂阿林曰阿蘓愚戇恐不能撫治欲少留以助之
阿林乃行克實留中都聞世宗發東京乃迎見於瑪竒
鋪除兵部尚書佩金牌將兵往東京行至中都聞南京
已定遂止克實材武過人狼戾好亂自以太祖孫頗有
異志世宗初至中都倥偬多事扈從諸軍未暇行賞或
有怨言昭武大將軍鄂倫正隆末被詔佩金牌取河南
兵四百人監完顏古雲軍於歸化次彰德會通吉和尚
持大定赦文至和尚使人招之鄂倫不聽率兵來迎和

尚亦以所將佛寧兵列陣待之鄂倫兵皆不肯戰遂請
降和尚邀之入相州收其甲兵置酒相勞鄂倫托腹疾
不肯飲至夜已張燈時時出門與其心腹密謀欲就執
和尚稍具弓矢和尚覺之佯為不知使其從者迫而伺
之鄂倫不得發上至中都近郊鄂倫上謁上亦撫慰之
鄂倫自慊初無降志及河南統軍司令史鄂爾多為人
狡險意圖事鄂倫取兵於河南統軍使圖們額哩頁鄂
爾多與俱來俱不自安同知延安尹李惟忠與熙宗弑

逆構殺韓王亨世宗疎斥之同知中都留守璋初自領其職因而授之完顏布呼為副統以罪解職居京師於是克實鄂倫李惟忠鄂爾多璋布呼謀欲因扈從軍士怨望作亂鄂倫曰押軍明安阿古喇必不違我惟忠曰惟忠嘗為神翼軍總管有兩銀牌尚在可以矯發內藏賞士萬戶高松與我舊必見聽衆曰若得此軍舉事無難矣鄂倫往約阿古喇阿古喇從之惟忠往說高松高松不聽語在松傳大定二年正月甲戌上謁山陵克實

中道稱疾而歸乙亥夜召鄂倫惟忠鄂爾多璋布呼會其家阿古喇以兵赴之璋曰今不得高松軍事不可成矣克實璋布呼乃擒鄂倫惟忠鄂爾多阿古喇詣有司自首既下詔獄克實不肯自言其始謀及與鄂倫面質然後歎伏上念兄弟少太祖孫惟數人在惻然傷之詔罪止克實一身其兄弟子孫皆不緣坐遂誅鄂倫惟忠鄂爾多阿古喇等其阿古喇下穆昆士卒皆釋之除璋彰化軍節度使布呼濬州防禦使辛巳詔天下是日賜

扈從萬戶銀百兩明安五十兩穆昆絹十匹甲士絹五匹錢六貫伊勒希以下賜各有差

阿蘓宗強之幼子也長身多力天德二年以宗室子授奉國上將軍累加金吾衛上將軍居於中都海陵伐宋以左衛將軍富察薩勒扎同知中都留守事佩金牌守管篇世宗即位東京阿蘓與璋率守城軍官烏凌阿實嘉努等入留守府殺薩勒扎府判穆延薩里罕衆以阿蘓行留守事璋自署同知留守事即遣穆昆實嘉努烏

凌阿愿富察芬徹大興少尹李天吉子磐等奉表東京
大定二年授橫海軍節度使賜以名鷹詔曰卿方年少
宜自戒慎留心政事改武定軍以母憂去官起復興平
軍節度使賜以襲衣廐馬遷廣寧尹坐贓一萬四千餘
貫詔杖八十削兩階解職入見於常武殿上曰朕謂汝
有才力使之臨民今汝在法當死朕以親親之故曲為
全貸當思自今戒懼勿復使惡聲達於朕聽改平涼濟
南尹卒官年三十七上命有司致祭賻銀千兩重綵四

十端絹四百匹

宗敏本名阿里布天眷元年封邢王皇統三年為東京
留守拜左副元帥兼會寧牧進拜都元帥兼判大宗正
事再進太保領三省事兼左副元帥領行臺尚書省事
封曹國王海陵謀弑立畏宗敏屬尊且材勇欲構誣以
除之時熙宗屢殺大臣宗敏憂之謂海陵曰主上喜殘
殺而國家事重奈何宗敏言時適左右無人海陵將以
此為指斥構害之自念無證不可發乃止及殺熙宗使

葛王召宗敏葛王者世宗初封也宗敏聞海陵召疑懼不敢往葛王曰叔父今不即往至明日如何與之相見宗敏入宮海陵欲殺之尚猶豫以問左右烏達曰彼太祖子也不殺之衆人必有異議不如除之乃使布薩呼圖殺之呼圖刃擊宗敏宗敏左右走避膚髮血肉狼藉遍地葛王見殺宗敏問於衆曰國王何罪而死烏達曰天許大事尚已行之此蟻蝨爾何足道者天德三年海陵追封宗敏為太師進封爵妃富察氏進國號封子薩

哈連舒國公賜名褒進封王阿里罕封密國公正隆六年契丹薩巴反海陵遣使殺諸宗室阿里罕遂見殺大定間詔復官爵

胙王元景宣皇帝宗峻子也本名常勝為北京留守弟扎拉為安武軍節度使皇統七年四月戊午左副點檢富察阿固岱子尚主進禮物賜宴便殿熙宗被酒酌酒賜元元不能飲上怒仗劍逼之元逃去命左丞宗憲召元宗憲與元俱去上益怒是時戶部尚書宗禮在側使

之跪手殺之海陵與唐古辯謀廢立海陵曰若舉大事誰當立者海陵意謂已乃太祖長房之孫當立而辯與秉德初意不在海陵常勝乃熙宗之弟辯荅曰無昨王常勝乎海陵復問其次辯曰鄧王子阿蘭海陵曰阿蘭屬疎由是海陵謂昨有人望不除之將不得立故心忌常勝并阿蘭是時阿蘭方為奉國上將軍河南軍士孫進自稱皇弟按察大王熙宗疑皇弟二字或在常勝也使塔斯鞠之無狀塔斯乃嘗疑海陵與唐古辯時時竊

議告之悼后者海陵知熙宗有疑常勝心因此可以除之謂熙宗曰孫進反有端不稱他人乃稱皇弟大王陛下弟止有常勝扎拉塔斯鞠不以實故出之矣熙宗以為然使唐古辯蕭肄按問塔斯塔斯自誣服故出常勝罪於是乃殺常勝及其弟扎拉并殺塔斯海陵乘此并擠阿蘭殺之阿蘭弟達蘭熙宗本無意殺之海陵曰其兄既已伏誅其弟安得獨存又殺之熙宗以海陵為忠愈益任之而不知其詐也海陵篡立追封常勝扎拉阿

蘭官爵親臨葬所致祭大定十三年六月丁巳世宗召
皇太子諸王侍食於清輝殿曰或稱海陵多能何也海
陵譎詐睚眦殺人空虛天下三分之二太祖諸孫中惟
胙王元天性賢者也元子育本名和卓大定二十七年
自南京副留守遷大宗正丞兼勸農副使上問宰臣曰
和卓為人如何平章政事襄參政宗浩對曰為人清廉
幹治上曰乃父亦然又曰費揚古胙王元外若愚訥臨
事明敏過人朕於兄弟間於元尤欵密

贊曰太祖躬擐甲冑以定國家舉無遺策而諸子勇畧材識足以遂父之志傳及太宗而諸孫享其成矣

金史卷六十九

欽定四庫全書蒼要卷六千三百十二

金史卷七十

元中書右丞相總裁托克托等修

列傳第八

薩哈

宗憲

本名阿蘭

希卜蘇

宗亨

本名托卜嘉

宗賢

本名色哩

實圖美

忠

本名都古魯訥

實實

思敬

本名薩哈

薩哈者景祖孫韓國公和卓之長子世祖之兄子也和
卓於次最長景祖方計定諸部愛世祖膽勇材畧及諸
子長國俗當異宮居而命和卓與世祖同邸和卓專治
家務世祖主外事世祖襲節度使越噶順而傳肅宗穆
宗皆景祖志也穆宗初襲位念和卓長兄不得立遂命
薩哈為國相穆宗履藉父兄趾業鋤除強梗不服已者
使薩哈取瑪奇嶺道攻阿蘇穆宗自將期阿蘇城下會
軍薩哈行次阿卜薩水烏雅部色埒貝勒來謁謂薩哈

曰聞國相將與太師會軍阿蘇城下此為深入必取之
策宜先撫定珊沁錫馨之路落其黨附奪其民人然後
合軍未晚也薩哈從之攻通恩城請濟師穆宗與之薩
哈遂攻下通恩城而與穆宗來會阿蘇城下通恩在南
阿蘇在北穆宗初遣薩哈分道即會攻阿蘇聞其用色
埒計先取通恩城與初議不合頗不然之及遼使來止
勿攻阿蘇然後深以先取通恩城為功也及以國相都
統討埒克卓多烏塔等軍而阿蘇亡入于遼終不敢歸

埒克卓多烏塔通恩皆降康宗既沒太祖稱達貝勒與薩哈分治諸部必塔水以北太祖統之拉林水人民薩哈統之明年甲午嗣節度命方至遼主荒于遊畋政事怠廢太祖知遼可伐遂起兵九月與遼人戰于界上獲色實太祖使告克于薩哈賜以所獲色實乘馬薩哈及將士皆驩呼曰義兵始至遼界一戰而勝滅遼必自此始矣遣子宗翰及完顏希尹來賀捷因勸進太祖未之從也十月師克寧江州破遼師十萬于鴨子河師還十

二月太宗及薩哈希卜蘇率諸將復勸進收國元年正月朔太祖即位薩哈行國相如故伐遼之舉決於都古
魯訥其大計實自薩哈啟之薩哈自以宗室近屬且長
房繼肅宗為國相既貴且重故身任大計贊成如此諸
人莫之或先也太祖即位後羣臣奏事薩哈等前跪上
起泣止之曰今日成功皆諸君協輔之力吾雖處太位
未易改舊俗也薩哈等感激再拜謝凡臣下宴集太祖
嘗赴之主人拜上亦答拜天輔後始正君臣之禮焉七

月太宗為安班貝勒授薩哈古倫貝勒希卜蘇愛滿貝勒果古倫齋貝勒所謂貝勒者蓋女直之尊官也太祖自正位號凡半歲未聞有封拜太宗介弟優禮絕等果母弟之最幼者薩哈希卜蘇以宗室同封拜九月加古倫烏赫哩貝勒天輔五年薨太祖往弔乘白馬勢額哭之慟及葬復親臨之贈以所御馬薩哈為人敦厚多智長于用人居純儉好稼穡自始為國相能馴服諸部訟獄得其情當時有言不見國相事何從決及舉兵伐

遼薩哈每以宗臣為內外倚重不以戰多為其功也天會十五年追封燕國王正隆降封陳國公大定三年改贈金源郡王配饗太祖廟廷謚忠毅十五年詔圖像于衍慶宮子宗翰宗憲宗翰別有傳

宗憲本名阿蘭頒行女直字書年十六選入學太宗幸學宗憲與諸生俱謁宗憲進止恂雅太宗召至前令誦所習語音清亮善應對侍臣奏曰此左副元帥宗翰弟也上嗟賞久之兼通契丹漢字未冠從宗翰伐宋汴京

破衆人爭趨府庫取財物宗憲獨載圖書以歸朝廷議
制度禮樂往往因仍遼舊宗憲曰方今奄有遼宋當遠
引前古因時制宜成一伐之法何乃近取遼人制度哉
希尹曰而意甚與我合由是器重之達蘭宗雋倡議以
齊地與宗宗憲廷爭折之當時不用其言其後宗弼復
取河南陝西地如宗憲策以捕宗磐宗雋功授昭武大
將軍修國史累官尚書左丞熙宗從容謂之曰嚮以河
南陝西地與宗人卿以為不當與今復取之是猶用卿

言也卿識慮深遠自今以往其盡言無隱宗憲拜謝遂
攝門下侍郎初熙宗以疑似殺左丞相希尹久之察其
無罪深閔惜之謂宗憲曰希尹有大功于國無罪而死
朕將錄用其孫如之何宗憲對曰陛下深念希尹錄用
其孫幸甚若不先明死者無罪生者何由得仕上曰卿
言是也即日復希尹官爵用其孫守道為應奉翰林文
字皇統五年將肆赦議覃恩止及女真人宗憲奏曰莫
非王臣慶幸豈可有間耶遂改其文使均被焉轉行臺

平章政事天德初為中京留守武安軍節度使封河內
郡王改太原尹進封鉅鹿郡王正隆例奪王爵再遷震
武武定軍節度使世宗即位遣使召之詔曰叔若能來
宜速至此若為赫舍哩志寧白彥敬所遏亦不煩叔憂
宗憲聞世宗即位先已棄官來歸與使者遇於中都遂
見上于小遼口除中都留守即遣赴任詔與元帥完顏
古雲同議軍事明年改西京留守八月改南京布薩忠
義自行臺朝京師宗憲攝行臺尚書省事召為太子太

師上謂宗憲曰卿年老舊人更事多矣皇太子年尚少
謹訓導之俄拜平章政事太子太師如故詔以太祖實
錄賜宗憲及平章政事完顏元宜左丞赫舍哩良弼判
祕書監溫王爽各一本伊喇高善努前為寧州刺史以
貪污免世宗以功臣子孫宗族中無顯仕者以為祕書
少監是時母喪未除有司奏其事宗憲曰高善努傲很
貪墨不可致之左右世宗曰朕以其父祖有功爾既為
人如此豈可玷職位哉追還制命因顧右丞蘇保衡參

政石琚曰此朕之過舉不可不改卿等當盡心以輔朕
也有司言諸路明安穆昆怙其世襲多擾民請同流官
以三十月為考詔下尚書省議宗憲乃上議曰昔太祖
皇帝撫定天下誓封功臣襲明安穆昆今若改為遷調
非太祖約臣謂凡明安穆昆當明核善惡進賢退不肖
有不職者其弟姪中更擇賢者代之上從其議進拜右
丞相大定六年薨年五十九上輟朝悼惜者久之命百
官致奠賻銀一千五百兩重綵五十端絹五百匹

希卜蘇本作辭卜蘇後定為希卜蘇昭祖之孫烏肯徹
之次子也初昭祖久無嗣與威順皇后圖克坦氏禱於
巫而生景祖及烏肯徹烏肯徹長而酗酒屢悖其母昭
祖沒圖克坦氏與景祖謀殺之部人怒欲害景祖圖克
坦氏自以為事而景祖得免希卜蘇健捷能左右射世
祖襲節度肅宗與拒和諾克薩克達戰於烏魯斯哈珠
水再失利世祖至將士無人色世祖使希卜蘇先陣於
托果原而身出搏戰敗其步軍希卜蘇自陣後奮擊之

敗其騎軍所乘馬中九矢不能馳遂步趨而出方戰其
外兄烏格名善射居敵騎中將射希卜蘇熟視識之呼
曰此小兒汝一人事乎何為摧鋒居前如此以弓弣繫
馬首而去是役也希卜蘇之功居多和諾克薩克達既
敗希卜蘇馬棄陣中者亦自歸世祖嘗疑珠嘉布勒圖
或與烏春等為變遣希卜蘇單騎往觀布勒圖與呼嚕
置酒樓上以飲之希卜蘇聞其私語昵昵若將執已者
一躍下樓傍出藩籬之外棄馬而歸其勇趨如此博諾

約烏春舉兵世祖至蘇素海甸與烏春遇肅宗前戰色
埒默希卜蘇佐之束縕縱火煙焰蔽天大敗烏春執博
諾以歸太祖獲瑪察獻馘于遼賞功穆宗太祖罕都希
卜蘇皆為詳袞後與鄂蘭哈瑪爾威泰俱佐薩哈攻埒
克城下之太祖伐遼使領兵千人夾侍左右珠赫店之
役惟希卜蘇之策與太祖合卒破十萬之師挫其軍鋒
遂與太宗薩哈等勸進收國元年七月與太宗薩哈杲
同日授為貝勒希卜蘇為愛滿貝勒云天輔七年太宗

與希卜蘇居守鄆王昂違紀律失衆法當死於是遼人以燕京降宋人約歲幣三月世宗生希卜蘇謂太宗曰兄弟骨肉以恩掩義寧屈法以全之今國家迭有大慶可減昂以無死若主上有責言以我為說太宗然之遂杖昂以聞太祖每伐遼輒命希卜蘇與太宗居守雖無方面功而倚任與薩哈比侔矣是歲七月薨會太祖班師道病太宗奉迎謁見恐太祖感慟而病轉甚不敢以薨告太祖輒問曰愛滿貝勒今安在太宗紿對曰當即

至矣正隆二年贈開府儀同三司追封曹國公大定三年進封金源郡王配饗太祖廟廷諡曰忠毅子呼沙呼國初有功天會中為真定留守子托卜嘉

宗亨本名托卜嘉性忠謹天輔初以宗室子充護衛擒宗磐宗雋有功加忠勇校尉遷昭信校尉尚廩局直長三年陞本局副使丁父憂時宗正官屬例以材選宗亨在選中起復為烏克遜達宗室將軍改會寧府少尹歷登州刺史改獻州刺史澤州定為特們羣牧使同知北

京路轉運使改澤州定國軍節度使海陵庶人南伐以
本職領武陽軍都總管過淮世宗即位以手詔班賜宗
亨宗亨得詔即入朝大定二年授右宣徽使未幾為西
北路兵馬都統以討契丹賊右副元帥布薩忠義與幹
罕遇于和托宗亨與左翼萬戶富察世傑等以七穆昆
軍與之戰失利及幹罕敗其黨瓜里札巴率衆南奔宗
亨追及之札巴詐稱降宗亨信之札巴詭曰瓜里走願
往邀宗亨不聽乃大縱軍士取賊所棄囊橐人畜多自

有之瓜里札巴亡入于宋坐是降為寧州刺史

宗賢本名色哩希卜蘇之孫也從都統杲取中原襲遼
帝于鴛鴦濼宗翰使達蘭襲耶律瑪格都統使普嘉努
及色哩等以兵助之普嘉努使色哩舍音費摩呼達達
嚕噶色埒耶律烏舍等各率兵分行招諭獲遼留守迪
延家人輜重并降羣牧官穆隆阿得馬甚多使逐水草
牧之色哩等趨伊德遂以偏師深入敵邀擊之薩哈戰
沒普嘉努至旺國崖西色哩兵會之累官至左副點檢

天眷二年方捕宗雋色哩坐會飲其家奪官爵未幾復
官皇統四年授世襲穆昆轉都點檢封幽國公拜平章
政事進拜右丞相兼中書令進拜太保左丞相監修國
史罷為左副元帥無何復為太保左丞相左副元帥如
故進太師領三省事兼都元帥監修國史出為南京留
守領行臺尚書省事復為左副元帥兼西京留守再為
太保領三省事復為左丞相兼都元帥色哩自護衛未
十年位兼將相常感激思自効以報朝廷雖於悼后為

母黨后專政大臣或因之以取進用色哩未嘗附之皇太子濟安薨魏王道濟死熙宗未有嗣子色哩勸熙宗選後宮以廣繼嗣不少顧忌於后后以此怨之與海陵同在相位未嘗少肯假借海陵雖尊而心憚色哩外以屬尊加禮敬而內常忌之海陵知悼后怨色哩因與后共力排出之色哩亦不以是少變胙王常勝死熙宗納其妻宮中頃之殺悼后及妃數人將以常勝妻為后未果也及海陵弑熙宗詭以熙宗將議立后召諸王大臣

色哩聞召以為信然將入宮謂人曰上必欲立常勝妻
為后我當力爭之及被執猶以為熙宗將立常勝妻而
先殺之也曰誰能為我言者我死固不足惜獨念主上
左右無助爾遂遇害

實圖美漢字一作神徒門扎蘭路完顏部人世為其部
長父卓巴納始祖弟博和哩四世孫雖同宗屬不相通
問久矣景祖時卓巴納使部人密遜來請復通宗系景
祖留密遜歲餘厚其餼廩飲食善遇之及還以幣帛數

筐為贈結其厚意久之扎蘭歲饑景祖與之馬牛為助
糴費使世祖往致之會世祖有疾實圖美日夕不離左
右世祖疾愈辭歸與握手為別約它日無相忘實圖美
體貌魁偉勇敢善戰質直孝友彊記辯捷臨事果斷世
祖襲位交好益深鄰部不悅遂合兵攻之實圖美使弟
阿索美率二百人南下拒敵敵兵千人已出其東據高
泉實圖美將五千人迎擊之敵將阿爾本者勇士也出
挑戰實圖美射中其馬阿爾本反射射中實圖美腹實

圖美拔箭戰愈力阿索美與勇士七人步戰殺阿爾本
諸部兵遂敗實圖美因招諭諸部使附於世祖世祖嘉
之後伐烏春烏木罕及通恩達薩塔等皆以所部從戰
有功弟阿索美尋卒及終喪大會其族太祖率官屬往
焉就以伐遼之議訪之方會祭有飛鳥自東而西太祖
射之矢貫左翼而墜實圖美持至上前稱慶曰烏鳶人
所甚惡今射獲之此吉兆也即以金版獻之後以本部
兵從擊高麗及伐遼功尤多王師攻下西京賜以金牌

其子察遜從行上謂曰吾妃之妹巴克繖者在遼俟其
獲當以為汝婦竟如其言上之西征諸將皆從實圖美
乃率善射者三百人來衛京師時太宗居守喜其至親
出迎勞繼聞黃龍府叛與睿宗討平之睿宗賜以奴婢
五百人師還賞賚良渥至是卒年六十一正隆二年封
金源郡王子實實思敬

完顏忠本名都古嚕訥字鄂斯歡實圖美之弟太祖器
重之將伐遼而未決也欲與都古嚕訥計事於是宗翰

宗幹完顏希尹皆從居數日少間太祖與都古嚕訥馮
肩語曰我此來豈徒然也有謀於汝汝為我決之遼名
為大國其實空虛主驕而士怯戰陣無勇可取也吾欲
舉兵仗義而西君以為如何都古嚕訥曰以主公英武
士衆用命遼帝荒于畋獵政令無常易與也太祖然之
明年遂伐遼使博勒和來徵兵都古嚕訥以兵會師收
國元年十二月上禦遼主兵次約囉都古嚕訥與尼楚
赫守達嚕噶路二年與幹魯芬徵會烏樸古討高永昌

破其兵東京降遂與烏楞古等禦耶律聶呼敗之于蒺藜
山拔顯州乾惠等州降天輔二年與羅索俱入見上曰
遼主近在中京而敢輒來各杖之三十太祖駐軍草濼
都古嚕訥取奉聖州破其兵五千于鷄鳴山奉聖州降
太祖入燕都古嚕訥出德勝口代實圖美為扎蘭路達
貝勒二年以扎蘭地薄斥鹵遷其部於蘇伯水仍以珠
蘇爾之田益之熙宗即位加太子太師十四年加保大
軍節度使同中書門下平章事薨天德二年配饗太祖

廟廷大定二年追封金源郡王

實實康宗時高麗築九城于海蘭甸實實從烏色軍太祖攻寧江州實實摧鋒力戰授明安後從舍音克中京襲遼主于鴛鴦灤畧定山敗夏將李良輔兵與羅索俱獲遼帝于伊都谷宗翰伐宋與尼楚赫圍守太原明年攻襄垣下潞城降西京至汴元帥府以懷孟北阻太行南瀕河控制險要使實實統十二明安軍鎮撫之於是殄平寇盜招集流亡四境以安天會四年薨熙宗時贈

特進大定間諡威敏世宗思太祖太宗創業艱難求當時羣臣勲業最著者圖像于衍慶宮遼王舍音金源郡王薩哈遼王宗幹秦王宗翰宋王宗望梁王宗弼金源郡王希卜蘇金源郡王幹魯金源郡王希尹金源郡王羅索楚王宗雄魯王棟摩金源郡王尼楚赫隋國公鄂蘭哈瑪爾金源郡王完顏忠豫國公普嘉努金源郡王薩里罕克國公劉彥宗特進烏楞古齊國公韓企先并實實凡二十一人初海陵罷諸路萬戶置蘇伯路節度

使世宗時近臣請改蘇伯為扎蘭節度使不忘舊功上
曰蘇伯扎蘭二水相距千里節度使治蘇伯不必改實
圖美親管明安子孫襲封者可改為托蘭明安以示不
忘其初

思敬本名薩哈扎蘭河人金源郡王實圖美之子希卜
蘇弟也初名思恭避顯宗諱改馬體貌雄偉美鬚髯純
直有材幹年十一從其父謁見太祖太祖在納琳淀方
獵因詔從獵射黃羊獲之太祖賜以從馬宗翰自太原

伐宗從其兄實實攻太原宗翰取河南思敬從完顏和
尼涉渡河下洛陽圍汴皆有功師還隸遼王宗幹麾下
太宗幸東京溫湯思敬權護衛押衛卒百人從行領穆
昆從征珠格麟有功遂充護衛天眷二年以捕宗磐宗
雋功遷顯武將軍熙宗捕魚混同江網索絕曹國王宗
敏乘醉鞭馬入江手引繫網大繩沉于水中熙宗呼左
右救之倉卒莫有應者思敬躍入水引宗敏出熙宗稱
歎賞賚甚厚擢右衛將軍襲扎蘭路萬戶授世襲穆昆

七年召見賜以襲衣廐馬錢萬貫及歸復遣使賜弓劔
是年入為工部尚書改殿前都點檢無何為吏部尚書
天德初為報諭宋國使宋人以舊例請觀錢塘江潮思
敬不觀曰我國東有巨海而江水有大於錢塘者竟不
往使還拜尚書右丞罷為真定尹用廉封河內郡王徙
封鉅鹿丁母憂起復本官改益都尹正隆二年例奪王
爵改慶陽尹大定二年招西南路招討使封濟國公兼
天德軍節度使俄為北路都統佩金牌及銀牌二西北

路招討使唐古布古岱副之將本路兵二千會布古岱視地形衝要或于狗灤屯駐伺契丹賊出沒之地置守

禦遠斥候賊至則戰不以晝夜為限詔布古岱曰爾兵少思敬未至不得先戰布薩忠義敗幹罕於陷泉詔思敬選新馬三千備追襲幹罕入于奚中思敬為元帥右都監以舊領軍入奚地張格宅會大軍討之敗偽節度特默獲二百餘人賊降將碩和卓與其黨錫勒塔干執幹罕并其母蘇尼妻子弟姪家屬及金銀牌印詣思敬

降思敬獻俘於京師賜金百兩銀千兩重綵四十端玉帶廕馬名鷹拜右副元帥經畧南邊駐山東罷為西京留守復拜右副元帥仍經畧山東初明安穆昆屯田山東各隨所受地主散處州縣世宗不欲明安穆昆與民戶雜處欲使相聚居之遣戶部郎中完顏讓往元帥府議思敬與山東路總管圖克坦克寧議曰大軍方進伐宋宜以家屬權寓州縣量留軍衆以為備禦俟邊事寧息明安穆昆各使聚居則軍民俱便還奏上從之其後

遂以明安穆昆自為保聚其田土與民田犬牙相入者
互易之三年四月召還京師以為北京留守賜金鞍勒
馬七年召為平章政事先是省併明安穆昆及海陵時
無功授穆昆者皆罷之失職者甚衆思敬請量才用之
上從其請思敬前為真定尹其子取部民女為妾至是
其兄乞離異其妾畏思敬在相位不敢去詔還其家九
年拜樞密使上疏論五事其一女直人可依漢人以文
理選試其二契丹人可分隸女直明安其三鹽澤官可

罷去其四與明安同勾當副千戶官亦可罷其五親王府官屬以文資官擬注教以女直語言文字上皆從之其後女直人試進士瓜爾佳衡尼瑪哈鑑圖克坦鑑完顏匡輩由此致宰相思敬啟之也久之上謂思敬曰朕欲修熙宗實錄卿嘗為侍從必能記其事跡對曰熙宗時內外皆得人風雨時年穀豐盜賊息百姓安此其大概也何必餘事上大悅世宗喜立事故其微諫如此大定十三年薨上輟朝親臨喪哭之慟曰舊臣也賻贈加

厚葬禮悉從官給孫烏呼肯扎塔大定二十四年除明威將軍授蘇伯路寶鄰山明安

贊曰和卓讓國世祖以開帝業薩哈治國家定社稷尊立太祖深謀遠畧為一代宗臣賢矣哉希卜蘇蓋前人之愆著勲五世易曰有子考無咎其此之謂乎始祖與季弟異部而處子孫俱為強宗而取遼之策卒定于都古魯訥豈天道陰有以相之邪

金史卷七十

欽定四庫全書薈要卷六千三百十三

金史卷七十一

元中書右丞相總裁托克托等修

列傳第九

幹魯

烏楞古貝勒 博勒和

烏哲庫

棟摩

宗敘

本名德壽

幹魯韓國公和卓第二子康宗初蘇伯水鴻觀部沃赫貝勒及威準哲爾德二部有異志威泰治之烏色幹魯

為之佐伐沃赫拔其城以歸高麗築九城於海蘭甸烏
色母疾病幹魯代將其兵者數月幹魯亦對築九城與
高麗抗出則戰入則守烏色用之卒城高麗收國二年
四月詔幹魯統諸軍與棟摩芬徹都古嚕訥合咸州路
都統烏楞古等伐高永昌詔曰永昌誘脅戍卒竊據一
方直投其隙而取之爾此非有遠大計其亡可立而待也
東京渤海人德我舊矣易為招懷如其不從即議進討
無事多殺高永昌渤海人在遼為裨將以兵三千屯東

京八甌口永昌見遼政日敗太祖起兵遼人不能支遂
覬覦非常是時東京漢人與渤海人有怨而多殺渤海
人永昌乃誘諸渤海弁其戍卒入據東京旬月之間遠
近響應有兵八千人遂僭稱帝改元隆基遼人討之久不
能克永昌使托卜嘉標哈以幣求救於太祖且曰願
併力以取遼太祖使華沙布往諭之曰同力取遼固可
東京近地汝輒據之以僭大號可乎若能歸款當處以
王爵仍遣係遼籍女直呼圖克來高永昌使托卜嘉與

華沙布呼圖克偕來而永昌表辭不遜且請還所俘渤海人太祖留呼圖克不遣遣大藥師努與托卜嘉往招諭之幹魯方趨東京遼兵六萬來攻昭蘇城額圖琿貝勒烏魯斯準與戰於伊都之地大破之五月幹魯與遼軍遇於瀋州敗之進攻瀋州取之永昌聞取瀋州大懼使家奴道拉以金印一銀牌五十來願去名號稱藩幹魯使華沙布薩巴往報之會渤海高禎降言永昌非真降者特以緩師爾幹魯進兵永昌遂殺華沙布等率衆

來拒遇于鄂爾和水我軍既濟永昌之軍不戰而却遂
北至東京城下明日永昌盡率其衆來戰復大敗之遂
以五千騎奔長松島初太祖下寧江州獲東京渤海人
皆釋之往往中道亡去諸將請殺之太祖曰旣已克敵
下城何為多殺昔先太師嘗破敵獲百餘人釋之皆亡
去旣而往往招其部人來降今此輩亡後日當有効用
者至是東京人恩勝努仙格等執永昌妻子以城降即
寧江州所釋東京渤海人也先太師蓋謂世祖云未幾

托卜嘉執永昌及道拉以獻皆殺之於是遼之南路係

籍女直及東京州縣盡降以幹魯為南路都統德特貝

勒留烏珍知東京事詔除遼法省賦稅置明安穆昆一

如本朝之制九月幹魯朝于巴爾密特水上慰勞之辛

亥辛幹魯第張宴官屬皆預賜賚有差矩威水部錫勒

哈塔殺綽哈布古德幹魯分和隆果烏珍之兵討之綽

哈宗室子魁偉善戰年十五隸軍中多見任用以兵五

百敗室韋獲其民衆及招降矩威水部以功為穆昆布

古德初事薩哈從討蕭哈里降矩威水部領行軍千戶
從破黃龍府戰達嚕噶城皆有功其破寧江州渤海伊
實布叛去布古德追復之至是與綽哈同被害幹魯至
希爾哈河錫勒哈塔遜去追及于哈達拉山誅其首惡
四人撫定餘衆詔曰汝討平叛亂不勞師衆朕甚嘉之
綽哈等死於國事聞其尸棄于河俟冰釋必求以葬其
民可三百戶為一穆昆以衆所推服者領之仍以其子
弟等為質幹魯乃還天眷中綽哈贈奉國上將軍布古

德贈昭毅大將軍幹魯從都統襲遼主遼主西走西京
已降復叛敵據城西浮圖下射攻城者幹魯與哈布爾
攻浮圖奪之復以精銳乘浮圖下射城中遂破西京夏
國王使李仁輔將兵三萬來救遼次于天德之境羅索
與幹魯合軍擊敗之追至野谷殺數千人夏人渡澗水
水暴至漂溺者不可勝紀遼主在陰山青塚之間幹魯為西
南路都統往襲之使巴喇繖薩噶爾瑪克以兵二百襲
遼權六院司喀勒扎於白水灤獲之遼主留輜重於青

塚領兵一萬往應州遣卓哩布達各率兵邀之宗望奄至遼主營盡俘其妻子宗族得其傳國璽幹魯使使奏捷曰賴陛下威靈屢敗敵兵遼主無歸勢必來降已嚴戒鄰境毋納宋人合饋軍糧令尼楚赫往代州受之詔徧諭有功將士俟朕至彼當次第推賞遼主戚屬勿去其輿帳善撫存之遼主伶俜去國懷悲負恥恐隕其命孽雖自作而嘗居大位深所不忍如招之肯來以其宗族付之已遣楊璞徵糧於宋尼楚赫不須往矣遼趙王

實訥埒及諸官吏竝釋其罪且撫慰之太祖還京師宗
翰為西北西南兩路都統幹魯及普嘉努副之宗翰朝
京師詔以夏人言宋侵略新割地以便宜決之幹魯奏
曰夏人不盡歸戶口資幣又以宋人侵賜地求援兵宋
之邊臣將取所賜夏人疆土盖有異圖詔曰夏人屢求
援兵者或不欲歸我戶口沮吾追襲遼主事也宋人敢
言自取疆土于夏誠有異圖宜謹守備盡索在夏戶口
通聞兩國事審處之幹魯復請弗割山西與宋則遼主

不能與宋郭藥師交通復詔曰宗翰請毋與宋山西地
卿復及此疆場之事當慎毋忽及宗翰等伐宋幹魯行
西南西北兩路都統事夫會五年薨皇統五年追封鄭
國王天德二年配享太祖廟廷子薩巴銀青光祿大夫
子色哩

烏楞古貝勒宗室子也太祖伐遼使烏楞古阿魯撫諭
幹琿集賽兩路係遼女直與遼節度托卜嘉戰敗之斬
托卜嘉古納嶺烏爾圖罕等十四達哈藩皆降幹琿集

賽兩路亦降與遼都統錫埒戰于咸州西敗之斬錫埒
于陣與羅索克咸州圖們呼圖以所部降于烏楞古鄰
部戶七千亦來歸遂與遼將赫伯戰破其軍數萬人太
祖嘉之以為咸州軍帥幹魯伐高永昌于東京烏楞古
以咸州軍佐之遼秦晉國王耶律聶呼來伐都古嚕訥
羅索博勒和等將二萬衆合烏楞古咸州兵往擊之呼
圖克嘗叛入于遼居東京南永昌據東京太祖索之以
歸烏楞古伐永昌以便宜署呼圖克為千戶蘇都哩鄂

勒博皆無功亦以便宜除官及以便宜解權穆昆哈布爾黃格達希布等職皆非其罪太祖聞之盡復哈布爾等穆昆呼圖克等皆罷去太祖聞烏楞古軍中往往闕馬而官馬多匿於私家遂檢括之耶律聶呼佛德遺烏楞古書請和烏楞古以聶呼書并所答書來上且請曰復有書問宜如何報之詔曰若彼再來請和汝當以阿蘇等叛亡索而不獲至於交兵我行人薩喇亦不遣還若歸薩喇及送阿蘇等則和好之議方敢奏聞仍恐議

和非實無失備禦聶呼軍于疾藜山烏楞古以兵一萬

戍東京太祖使都古嚕訥羅索復以兵一萬益之詔曰

遼主失道肆命徂征惟爾將士當體朕意拒命者討之

服者撫安之母貪俘掠毋肆殺戮所賜聶呼詔書可傳

致也詔聶呼曰汝等誠欲請和當廢黜昏主擇立賢者

副朕弔伐之意然後可議和約不然當盡并爾國其審

圖之聶呼復書烏楞古云降去人赫伯見還則當送阿

蘇等上曰赫伯等乃交兵之後來降阿蘇則平日以罪

亡去其事特異復詔聶呼令此月十三日送阿蘇至顯
州各遣重臣議疆場事烏楞古等攻顯州知東京事完
顏鄂倫以兵來會即以兵三千先渡遼水得降戶千餘
遂薄顯州郭藥師乘夜來襲鄂倫擊走之烏楞古等遂
與聶呼等戰于蒺藜山大敗遼兵追北至阿額勒錦獲
佛德家屬遂圍顯州攻其城西南軍士實都踰城先入
燒其佛寺煙焰撲人守陴者不能立諸軍乘之遂拔顯
州於是乾懿豪徽成川惠等州皆降乾州後為閭陽縣

遼諸陵多在此禁無所犯徙成川州人于同銀二州居之聶呼再以書來請和烏楞古承前詔以阿蘇為言答之駐軍顯州以聽命賜烏楞古等馬十匹詔曰汝等力摧大敵攻下諸城朕甚嘉之遼主未獲人心易搖不可恃戰勝而失備禦遼雙州節度使張崇降烏楞古以便宜命復其職仍令世襲烏楞古久在咸州多立功亦多自恣和勒博雙寬等告烏楞古不法事遼帝在中京可追襲而不追襲咸州糧草豐足而奏數不以實攻顯州

獲生口財畜多自取聶呼巴喇織等亦告貝勒蒙克瑪
奇鄂倫齊遜阿爾本伊喇等多取生口財畜遂以闍格
代為咸州路都統闍格亦宗室子也既代烏楞古治咸
州初都古魯訥羅索奏攻顯州新降附之民可遷其富
者于咸州路貧者徙內地於是詔使闍格擇其才可幹
事者授之穆昆其豪右誠心歸附者擬為明安錄其姓
名以聞饑貧之民官賑給之而使棟摩為其副統云久
之遼通祺雙遼四州之民八百餘家詣咸州都統降上

曰遼人賦斂無度民不堪命相率求生不可使失望分
置諸部擇善地以處之太祖召烏楞古自問之烏楞古
引伏闕格鞠鄂倫等詔降烏楞古為穆昆而禁錮鄂倫
等天輔六年討賊于牛心山道病卒天眷中贈特進天
德二年配享太祖廟庭大定十五年諡莊翼

博勒和安帝五代孫太祖伐遼使博勒和徵都古嚕訥
兵失期杖之後與琿楚以四千人助羅索尼楚赫攻黃
龍府薩里罕察必達爾兄弟齊達勒部人嘗寇扎蘭路

穆宗遣博勒和討之至阿里瑪河薩里罕偽降略馬畜
三百而去復沃楞部掠二十五寨太祖復使博勒和討
之博勒和渡索歡河招降旁近諸部因籍丁壯為軍至
特通額水察必達爾偽降復叛執而殺之博勒和至德
里城圍之薩里罕遁去博勒和破其城執其妻子薩里
罕遂降曰我之馬牛財貨盡矣何以為生博勒和與之
馬十匹齊達勒部產良馬太祖使赫舍哩阿實罕掌其
畜牧博勒和及子博索俱為穆昆天輔五年摘取諸路

明安中萬餘家屯田于泰州博勒和為都統賜耕牛五十博勒和舊居按春水自是從居泰州并實登扎克丹阿里托歡錫勒塔干等俱徙焉唯族子薩拉噶嘗為世祖養子獨得不徙太祖取燕京博勒和為右翼兵出居庸關大敗遼兵遂取居庸蕭妃遯去都監高陸等來送款乞降實古納追蕭妃至古北口蕭妃已過三日不及而還上令博勒和和色哩率輕騎追之蕭妃已遠去獲其從官統軍察喇宣徽扎拉并其家族及銀牌二印十

有一及達喇叛博勒和實古納討平之其羣官率衆降者就使領其所部太宗以空名宣頭及銀牌給之同時有博勒和者羅索平陝西博勒和勝額監戰後為平陽尹西南路招討使終於慶陽尹泰州博勒和守邊屢有功太宗賜衣一襲并賜其子博碩八年以甲冑賜所部諸穆昆天會十二年加同中書門下平章事天眷元年駐烏爾古德呼勒地薨贈開府儀同三司諡剛毅子博碩襲明安天眷二年為泰州副統都子威泰廣威將軍

博索官特進子烏哲庫

烏哲庫善騎射年二十以本班祇候郎君都管從征伐
有功授修武校尉皇統二年權領泰州軍平陝西至涇
州大破宋兵於馬西鎮超遷寧遠大將軍襲明安復以
本部軍從宗弼權都統正隆末從海陵伐宋契丹反與
德昌軍節度使伊蘇瑪勒同討之詔許便宜從事大定
初除咸平尹駐軍泰州俄改臨潢尹攝元帥左都監與
廣寧尹布薩歡塔俱從元帥右都監實圖美解臨潢之

圍契丹引衆東行烏哲庫追及于幹里山押軍明安契
丹呼魯蘇以所部助敵攻官軍官軍失利泰州節度使
烏哩頁來救未至臨潢與敵遇烏哩頁敗僅以數騎脫
歸敵攻泰州其勢大振城中震駭將士不敢出戰敵四
面登城押軍明安烏克遜阿里布率軍士數人持鋤刀
循城應敵力戰斫刈甚衆敵乃退泰州得完烏哲庫迺
使穆昆富埒琿徙百姓旁邑及險阨之地以俟大軍明
年聚甲士萬三千於濟州會元帥默音敗幹罕於長濼

戰霧霖河戰陷泉皆有功改呼爾哈節度使卒烏哲庫性聰敏有才智善用軍常出敵之不意故能以寡敵衆而所往無不克號為鵲軍云

棟摩世祖第九子太祖異母弟也高永昌據東京幹魯征伐之命棟摩等為之佐已克瀋州城中出奔者棟摩邀擊殆盡與永昌隔鄂爾和水衆遇淖不敢進棟摩以所部先濟諸軍畢濟軍東京城下城中人出城來戰棟摩破之于首山殲其衆獲馬五百匹及烏楞古以罪去

咸州棟摩代之於是棟摩為咸州路副統遼議和久不成太祖進兵詔咸州路都統司令色克留兵一千鎮守棟摩以餘兵會于渾河太祖攻上京實臨潢府諭之下遼人恃儲蓄自固上親臨陣棟摩以衆先登克其外城留守托卜嘉率衆出降都統杲兵至中京棟摩自城西沿土河以進城中兵尚餘三千皆不能守遂克之宗翰等攻西京棟摩羅索等於城東為木洞以捍蔽矢石於北隅以芻芻塞其隍城中出兵萬餘將燒之溫特赫

博恰率衆力戰執旗者被創博恰自執旗奮擊却之又
為四輪革車高出於堞棟摩與麾下乘車先登諸軍繼
之遂克西京與遼步騎五千戰于朔州之境斬首三百
級復敗遼騎三百于河陰遼兵五千屯于馬邑縣南復
擊破之隳其營壘盡得其車馬器械遼兵三萬列營于
西京之西棟摩以三千擊之棟摩使士卒皆去馬陣於
溝塹之間曰以一擊十不致之死地不可使戰也謂衆
曰若不勝敵不可以求生於是人皆殊死戰遼兵遂敗

追至其營而止明日復敗其兵七百餘人興中府宜州
復叛棟摩討之并下詔招諭詔棟摩曰遼之土地皆為
我有彼雖復叛終皆吾民可縱其耕稼毋得侵掠貝勒
蒙克薩布烏達等獲契丹糾堅興中平棟摩為南路都
統討和勒博詔曰和勒博以烏合之衆保據險阻其勢
必將自斃若彼不出掠毋庸攻討耶律阿固齊等殺和
勒博于景薊之間其衆遂潰張覺據平州叛入于宋棟
摩自錦州往討之覺將以兵脅遷來潤隰四州之民棟

摩至潤州擊走張覺軍逐北至榆關遣倖持書招之復敗覺兵於營州東北欲乘勝進取南京時方暑雨退屯海孺逐水草休息使布呼蒙克兩明安屯潤州制未降州縣不得與覺交通九月棟摩破覺將王孝古於新安敗覺軍於樓峯口復與覺戰於兔耳山棟摩大敗太宗使宗望問棟摩敗軍之狀宗望遂以棟摩軍討覺及宗望破張覺太宗乃赦棟摩召宗望赴闕棟摩連破偽都統張敦固遂克南京執敦固殺之上遣使迎勞之詔曰

聞下南京撫定兵民甚善諸軍之賞卿差等以給之又
詔曰南京疆場如舊屯兵以鎮之命有司運米五萬石
于廣寧給南京潤州戍卒遂下宜州拔义牙山殺其節
度使韓慶民得糧五千石詔以南路歲饑許田獵其後
宋童貫郭藥師治兵棟摩輒因降人知之即具奏語在
宋事中而宗翰宗望皆請伐宋於是棟摩副宗望伐宋
宗望以棟摩屬尊先皇帝任使有功請以為都統以監
戰事於是棟摩為都統素赫副之敗郭藥師兵于白河

遂降燕山以先鋒渡河圍汴宋人請盟將士分屯于安肅雄霸廣信之境宗望還山西棟摩與劉彥宗留燕京節制諸軍八月復伐宋大軍克汴州諸軍屯于城上城中諸軍潰而西出者十三萬人棟摩達蘭分擊大敗之師還棟摩為元帥左都監攻河間下之大破敵兵萬餘於莫州宗輔為右副元帥徇地淄青棟摩與宗弼分兵破山谷諸屯宋李成兵圍淄州烏凌阿托雲破之棟摩克濰州達呼布珠爾蘇連破趙子昉等兵至于河上烏

凌阿托雲破敵于靈城鎮及議伐康王棟摩欲先定河北然後進討太宗乃酌取羣議之中使羅索取陝西宗翰宗輔南伐天會六年薨年四十熙宗時追封吳國王天德二年配享太祖廟庭正隆改封譚王大定二年徙封魯王諡莊襄子宗敘

宗敘本名德壽棟摩第四子也奇偉有大志喜談兵天德二年充護衛授武義將軍明年授世襲穆昆擢御院通進遷翰林待制兼修起居注轉國子司業兼左補闕

正隆初轉符寶郎在宮職凡五年皆帶劔押領宿衛遷
大宗正丞以母憂去官以本官起復未幾遷侍衛親軍
馬軍都指揮使改左驍騎都指揮使明年海陵幸南京
宗敘至汴契丹薩巴反宗敘為咸平尹兼本路兵馬都
總管以甲仗四千付之許以便宜宗敘出松亭關取牛
遞于廣寧聞世宗即位將歸之廣寧尹安塔哈弟雅爾
堅勸宗敘乃還興中白彥敬赫舍哩志寧使宗敘奉表
降乃見世宗於梁魚務授寧昌軍節度使明年二月契

丹攻寧昌宗敘止有女直渤海騎兵三十漢兵百二十人自將擊之遇賊千餘騎漢兵皆散走宗敘與女直渤海三十騎盡銳力戰身被二創所乘馬中箭而仆遂為所執居百餘日會賊中有臨潢民伊喇阿達等盜馬授之得脫歸宗敘陷賊久盡得其虛實見元帥完顏默音平章政事完顏元宜謂之曰賊衆烏合無紀律破之易爾於是帥府欲授軍職宗敘見默音貪鹵掠失事幾欲歸白上不肯受職曰我有機密須面奏是夕乃遁去至

廣寧矯取驛馬馳至京師而帥府先事以聞上遣中使詰之曰汝為節度不度衆寡戰敗被獲幸得脫歸乃拒帥府命輒自乘傳赴都朕姑置汝罪可速還軍併力破賊宗敘附奏曰臣非辭難者事須面奏不得不來遂召入乃條奏賊中虛實及諸軍進退不合事機狀詔大臣議皆以其言為然是時已詔布薩忠義代默音為元帥進討於是拜宗敘為兵部尚書以本職領左翼都統率宗寧烏雅扎拉烏凌阿喇實兵各千人號三萬佐忠義

軍至和托遇賊與戰右翼都統宗亨先敗走忠義亦引却宗敘勒本部遮擊之麾帳下士三百捨馬步戰賊不得逞大軍整列復至合勢擊之賊遂敗去而元帥右監軍赫舍哩志寧率軍至追及幹罕於陷泉大破之復與志寧及圖克坦克寧追至七渡河大敗之元帥忠義遂留宗敘自從賊平入為右宣徽使宋兵據海州將謀深入詔以宗敘為元帥右監軍往禦之宗敘駐山東分兵據守要害敵不得西尋奉詔與左副元帥赫舍哩志寧

參議軍事四年宗敘入朝奏曰暑月在近頓兵邊陲飛輓頗艱乞俟秋涼進發上從其請及還軍授以成算賜襲衣弓矢九月渡淮宗敘出唐鄧北至襄陽屢戰皆捷明年宋人請和軍還除河南路統軍使河決李固渡分流曹單之間詔遣都水監梁肅視河決宗敘言河道填淤不受水故有決溢之患今欲河復故道卒難成功辛而可塞它日不免決溢山東非曹單比也沿河數州驟興大役人心動搖恐宋人乘間煽誘構為邊患梁肅亦

請聽兩河分流以殺水勢遂止不塞十年召至京師拜
參知政事上曰卿奏黃河利害甚合朕意朕念百姓差
調官吏為姦率斂星火所費倍蓰委積經年腐朽不可
復用若此等類百孔千瘡百姓何以堪之卿參朝政擇
利而行以副朕心及與上論南邊事宗敘曰南人遣諜
來多得我事情我遣諜人多不得其實蓋彼以厚賞故
也上曰彼以厚利資諜人徒費其財何能為也十一年
奉詔巡邊六月至軍中將戰有疾詔以右丞相赫舍哩

志寧代宗敘還七月病甚遺表朝政得失及邊防利害
力疾使其子上之薨年四十六上見其遺表傷悼不已
輟朝遣宣徽使敬嗣暉致祭賻銀千兩綵四十端絹四
百匹上謂宰臣曰宗敘勤勞國家他人不能及也初宗
敘嘗請募貧民戍邊屯田給以廩粟既貧者無艱食之
患而富家免更代之勞得專農業上善其言而未行也
十七年上謂宰臣曰戍邊之卒歲冒寒暑往來番休以
馬牛往戍往往皆死且奪其農時敗其生業朕甚閔之

朕欲使百姓安于田里而邊圉彊固卿等何術可以致此左丞相良弼曰邊地不堪耕種不能久戍所以番代耳上曰卿等以此急務為末事耶往歲參政宗敘嘗為朕言此事若宗敘可謂盡心於國者矣今以兩路招討司烏庫哩實壘部族臨潢泰州等路分置堡戍詳定以聞朕將親覽上追念宗敘聞其子孫家用不給詔賜錢三千貫明昌五年配享世宗廟廷

金史卷七十一